

四庫全書

史部

欽定四庫全書

史部

閩中理學淵源考卷十一至五

詳校官編修臣謝振定

刑部郎中臣許兆椿覆勘

總校官原任中允臣王燕緒

校對官編修臣范來宗

謄錄監生臣李鳳丹

欽定四庫全書

閩中理學淵源考卷十一

廣平府知府李清馥撰

浦城楊氏家世學派

真氏西山曰國朝南方人物之盛自浦城始浦城人物之盛自文莊公及文公始再考史稱宋一海內文治日起楊文公首以辭章擅天下為時所宗蓋其清忠鯁亮之氣未卒大施仁宗嘗稱其有君子大節特

贈其官謚以文蓋有由來也文莊為文公從父史稱其純厚清介尚名教非道干進尤所痛嫉蓋亦卓然儒者程渠矣茲錄二公著其家世源流所自焉

文莊楊仲猷先生徽之

楊徽之字仲猷一名儀之浦城之祖邵仕閩為義軍校家世尚武父澄獨折節為儒終浦城令徽之甫冠通群經尤刻意於詩與邑人江文蔚江為齊名嘗肄業廬山白鹿洞時李氏據有江表徽之恥官偽廷乃潛服至汴

洛以文投竇儀王朴深賞遇之周顯德中舉進士歷著作佐郎右拾遺力言太祖人望所歸不宜典禁兵太祖既得天下將因事誅之晉王諫曰周室忠臣也乾德初出為大興令開寶中遷左拾遺右補闕寢以登用太宗尤深器之時青宮初建命為首僚寄之羽翼因索其所著書徵之以數百篇奏御復獻詩為謝太宗稱賞遷侍御史權判刑部轉庫部員外郎奉詔彙編文苑英華歷遷刑兵二部郎中端拱初拜左諫議大夫出知許州入

判史館事加修撰因次對上言陛下嗣統鴻圖闡揚文治廢墜修舉儒學響臻然擅文章者多超遷明經業者罕除用向非振舉曷勸專勤師法不傳祖述安在且京師四方之會太學首善之地今五經博士並闕其員非所以崇教化獎人材由內及外之道也望發明詔博求通經之士簡之朝著拔自草萊增置員數分教胄子隨其所業授以廩稍且優加旌別使淹貫經士皆蒙厚賞則天下知所勸矣太宗嘉納謂宰相曰徽之儒雅搢履

無玷宜置館閣未幾改判集賢院坐漏洩張洎語出為  
山南東道行軍司馬改鎮安軍真宗咸平初加禮部侍  
郎以足疾請告真宗駐蹕大名特降手詔存諭明年春  
車駕還遣使臨問卒年八十贈兵部尚書賜其家錢  
五十萬絹五百疋無子錄其外孫宋綬太常寺太祝  
姪孫偃集並同學究出身徽之純厚清介多識典故守  
規矩尚名教非道干進尤所痛嫉嘗言溫仲舒寇準用  
搏擊取貴位使後輩務習趨競禮俗寢薄世謂其知言

寡諧於俗惟李昉王祐深所推服石熙載李穆賈黃中  
則與為文義友既沒有集二十卷留於家真宗令夏侯  
嶠取以進後徽之妻卒乃葬復以緡帛賜其家景祐間  
賜太子太師謚文莊祀白鹿洞從孫億閩書真西山  
撰文莊公書堂

記  
宏  
簡錄

文公楊大年先生億

楊億字大年浦城人天資穎悟七歲對客談論為文揮  
翰不輟有老成風雍熙初年十一博覽強記太宗聞其



名詔江南轉運使張法華就試詞藝送闕下連三日得  
對試詩賦五篇下筆立成太宗深加賞歎即授秘書省  
正字俄丁外艱服除會徽之知許州億往依之晝夜務  
學不息徽之嘆曰興吾門者汝矣淳化中改太常寺奉  
禮郎仍令讀書秘閣獻二京賦命試翰林賜進士第遷  
光祿寺丞直集賢院表求歸鄉里賜錢十五萬至道二  
年遷著作佐郎帝知其貧屢頒霑賚每有奏頌時時稱  
善真宗即位超拜左正言詔錢若水修太宗實錄奏億

叅預凡八十卷億獨草五十六卷書成乞外補就養知處州真宗知其才長史學留不遣固請乃許之召還拜左司諫知制誥賜金紫咸平中西鄙未寧詔近臣議靈州棄守之事億上疏言存有大害棄有大利灑灑千餘言景德初以家貧乞典郡江左詔令知通進銀臺司兼門下封駁事俄伴史館會修冊府元龜與王欽若同總其事序次體制皆億所定羣僚分撰篇序詔經億竄改乃用三年召為翰林學士又同修國史凡變例皆出億

手大中祥符初加兵部員外郎戶部郎中五年以疾在告遣中使致太醫視之億拜章謝上作詩批紙尾有副予前席待名賢之句以久疾求解近職優詔不許但權免朝直億剛介寡合在書局惟與李繼路振刁衍陳鉞劉筠輩厚善當時文士咸賴其品題或被貶議者退多怨謗王欽若驟貴億素薄其人欽若銜之屢挾其失陳彭年方以文史售進忌億名出其右相與毀訾真宗皆不惑其說天禧二年冬拜工部侍郎四年復為翰林學

士卒年五十七初真宗欲立德妃為后欲得億草詔使  
丁謂諭旨億卒不草及卒仁宗令議追贈有司言故事  
非曾任二府及事東宮法不應贈仁宗曰億有君子大  
節可贈禮部尚書謚曰文億文格雄健才思敏捷精密  
有規裁尤長典章制度喜誨誘後進以成名者甚衆人  
有片詞可紀必為諷誦一時學者翕然宗之手集當世  
述作數千篇為筆苑時文錄性耿介重交遊尚名節多  
周給親友故所得祿俸亦隨而盡所著括蒼武彞頤陰

韓城退居汝陽蓬山冠黿等集內外制刀筆共一百九十四卷立從子絃為後錄為奉禮郎

閩書  
宏簡  
錄  
通志

### 備考

范文正公贊楊文公畫像曰公以命世之才其位不充故天下知公之文而未知公之道也昔王文正公居宰府僅二十年未嘗見愛惡之迹天下謂之大雅萊公當國真宗有澶淵之幸而能左右天子如山不動却戎狄保宗社天下謂之大忠樞密扶風馬公慷慨立朝有犯

無隱天下謂之大直此三君子者一代之偉人也公與  
三君子深相交許情如金石則公之道其正可知矣  
王沂國文正公曾嘗語曰昔楊文公有言人之操履無  
若誠實吾每欽佩斯言苟執之不渝夷險可以一致  
楊文公在翰林以讒佯狂去職然聖眷之不衰聞疾愈  
即起為郡未幾復以判秘監召既到闕以詩賜之曰瑣  
闥往年司制誥共嘉藻思類相如蓬山今日詮墳史還  
仰多聞過仲舒報政列城歸覲後疏恩高閣拜恩初諸

生濟濟彌瞻望鉛槧諮詢辨魯魚祖宗愛惜人材保全忠賢之意如此文公後卒與寇萊公力排宮闈協定大策功雖不終其盡力於國者亦可以無愧也

石林詩話

真文忠公德秀撰楊文莊公書堂記曰浦城夢筆山等覺院邑人禮部侍郎楊公澄為本縣今日所建也侍郎之子文莊公少讀書於此山既去以文學節義擅聲中朝為薦紳標式後人即其處為書堂繪公父子祠之按公名徽之字仲猷甫冠通羣經尤刻意於詩得騷人之

趣時李氏王江表公恥官偽廷杖策走中原以周顯德  
三年登第入文館升諫垣嘗論太祖有人望不可典禁  
兵國初出司征於方城繼為大興峨眉二縣令開寶中  
召還寢以登用太宗尤深器之世謂帝以能詩知公而  
不知公之受知聖明者不專在是也當公之去國也一  
遷而楚再徙而秦又再轉而蜀山川益寥遠而公嘉陽  
諸詠皆翛然自得亡秋毫隕穫意胸中所存其亦遠矣  
入侍禁中新承聖睞至摘其詩雋語筆之御屏中辭章



翰墨同時豈乏其人而公獨得此者非重其詩重其節也晚事定陵尤被寵渥初置翰林講讀學士公與邢昺首與其選雖未及大用以終而平生所立凜凜玉雪無一節可疵從孫文公億少依公以學既皆以文章名天下而清風雅操奕奕相望浦城人物之盛自二公始紹定改元七世孫震榮將新其書堂之舊謂某盍為之記藐是晚出匪工於辭獨念前輩風流相去日遠後生小子鮮或聞知故為推迹本末刻之堂中使吾黨之士聞

而慕之平居講學以淬磨志行自期有位於時以扶植世道自許則公之遺風庶幾復見而吾邦之人物其亦有興乎若夫卑陬澠忍志於榮寵利事溫飽而已豈惟重桑梓之羞過公之堂當必有泚其顙者矣

浦城章氏家世學派

按志乘稱浦城甲族盛矣蓋揚起於文莊章肇自卹公蓋練夫人孫夫人陰德世多傳焉今約錄楊章二家為宋代閩中文獻所始餘未得槩及云

文簡章希言先生得象

章得象字希言世家泉州高祖仔釣以戰攻守三策投  
王審知審知命為將戍浦城遂家焉咸平五年進士及  
第為大理評事知玉山縣遷大理寺丞歷知台州南雄  
州徙洪州楊億以公輔器薦之未幾召試為史館安撫  
京東權三司度支判官累遷尚書刑部郎中使契丹遂  
以兵部郎中知制誥踰年為翰林學士遷右諫議大夫  
以給事中為群牧使累遷戶部侍郎遂拜同中書門下

平章事集賢殿大學士仁宗謂曰向者太后臨朝群臣  
邪正朕皆默識之卿清忠無所干附今日用卿職此也  
陝西用兵加中書侍郎兼工部尚書兼樞密使辭所加  
官明年以工部尚書為昭文館大學士慶歷五年拜鎮  
安軍節度使同平章事封郇國公徙判河南府守司空  
致仕卒贈大尉兼侍郎謚文憲皇祐中改謚文簡得象  
在翰林十二年憲章太后臨朝宦官方熾太后每遣內  
侍至學士院得象正色待之或不交一言在中書八年

宗黨親戚一切抑而不進以簡重鎮止浮競而已他無所建明至其渾厚有容喜薦拔人天下終以為長者

閩書

朝奉章端叔先生甫

章甫字端叔年十四辭親求師友薄游江淮間殆十年卒以名聞熙寧三年進士調臨州尉邑有盜獄株連至不可詰訊甫按實抵三人於法餘悉不問哲宗即位轉承議郎通判宿州先是南京押綱侍禁史士宗侵耗官米數百石反訟倉官交納不公獄久不決朝廷以委甫

甫至以片言折之士宗雖坐流竄自以為不寬兩遷為朝散郎繼丁親憂累遷至太府寺丞召對稱旨除府界提舉常平等事鄆陵舊有雙泊河數溢為民害為增濬河外故道是歲河朔饑甫召而廩給之因以用其力興築堤成民不告病饑者得全活徽宗立轉朝奉大夫未幾除知處州時承平日久年穀屢豐天下諱言災傷甫還朝首言淮甸歲凶宜加賑恤朝命遣使大發倉廩民賴以濟崇寧初黨論復興甫除郎官得旨陞對抗言元祐

臣僚削秩投荒皆緣國事陛下即位稍令內徙道路交  
慶今復刺言著籍禁錮其子孫恐非陛下本意由是與  
時論不合尋知泰州遂掛冠退居吳門未幾時旨落致  
仕復知泰州之官數月乞宮祠卒甫莊重簡默接人以  
和行已蒞官一本於誠其論天下事不苟不隨期當理  
讀書萬卷增校精至有文集二十卷孟子解義十四卷

閩書  
通志

州守章榮之先生授

章授字榮之得象從孫少從得象游京師學擅辭場紹  
聖四年省試第一元符中陳瓘薦其賢除知海州

閩書

章表民先生望之

章望之字表民浦城人以伯父得象蔭除秘書省校書  
郎監杭州茶庫踰年辭疾去上書論時政凡萬餘言不  
報兄拱之知晉江縣忤其守得罪望之號訴於朝拱之  
竟得脫歐陽修韓絳吳奎劉敞范鎮同薦其才除簽書  
建康軍節制判官又除知烏程縣俱不赴遂以光祿寺



丞致仕卒望之喜議論宗孟軻言性善排斥荀卿揚雄  
韓愈李翱之說著救性七篇歐陽修論魏梁為正統望  
之以為非著明統三篇李覲謂仁義禮知信樂政刑皆  
出於禮望之著禮論一篇以訂其說又有歌詩雜文數  
百篇集為三十卷

莆陽蔡氏家世學派

按公當時與歐陽文忠犯顏廷諍培沃朝廷正直忠  
厚之風與歐陽徂徠尹公並稱四君子惜其設施措

畫未盡著廟廊而多布在列郡歐公撰墓志言往時  
閩人多好學而專用賦以應科舉公得先生周希孟  
以經術教授學者親至學舍執經講問為諸生率又  
尊禮陳氏烈陳氏襄鄭氏穆一時人士感奮是公與  
海濱四先生同時倡學於閩而後學尚有未及詳考  
者也其涖溫陵造建萬安橋樹植松陰七百餘里兩  
至斯郡惠澤尤深王忠文公十朋踵公後者道泉人  
稱太守之賢者必以公為首云馥嘗往來莆之楓亭

蓋公故里也遺風八百餘年訪求舊跡莫可追尋拜  
仰公之墳塋逼近行路墓木雜然而後嗣亦式微播  
遷莫可考矣不禁低徊嗟嘆夫公之功烈德誼列郡  
後嗣尚有追祀馨香者何獨故邦寂然衰落至此耶  
因輯公家世學派而重興感云乾隆丙子十月下泮  
書

忠惠蔡君謨先生襄

蔡襄字君謨仙遊人年十八天聖八年舉進士調西京

留守推官改著作佐郎館閣校勘范仲淹以言事忤丞相呂夷簡落職知饒州余靖論救之尹洙請與同貶歐陽修移書責司諫高若訥不言由是三人者皆坐譴公作四賢一不肖詩以識其事詩成都人士爭相傳寫契丹使者至買歸張於幽州之館一時稱重慶厯初天下無事士大夫寬弛久安仁宗慨然思正百度以修太平排羣議進退二三大臣親擢靖修及王素三人為諫官使拾遺補闕公又以詩賀三人者以其詩聞仁宗亦命

公知諫院兼修起居注遇之甚寵公值事感激無所迴避權倖畏斂不敢撓法干政而仁宗益與大臣圖議屢下詔書勸農桑興學校革弊修廢天下悚然知其銳於治於此之時言事之臣無日不進公補益尤多四年以右正言直史館出知福州以便親遂為福建路轉運使復古五塘以溉民田奏減五代時丁口稅之半丁父憂服除復入修起居注進知制誥兼判注內銓御史呂景初吳中復馬遵坐論梁丞相適罷臺職除他官公封還

辭頭不草制其後屢有除授非當者必皆封還而仁宗  
遇公益厚曰有子如此其母之賢可知命特賜冠被以  
寵之至和元年遷龍圖閣直學士知開封府三年以樞  
密直學士知福州未幾復知泉州公在福州禮其士之  
賢者以勸學興善而變民之故俗除所甚害往時閩人  
專用賦以應科舉公得鄉先生周希孟以經術傳授學  
者常至數百人公為親至學舍執經講問為諸生率延  
見處士陳烈尊以師禮而陳襄鄭穆輩其德行著稱公

皆折節下之以風教生徒又作五戒以教民若浮屠巫覡蓄蠱之害一切禁止其在泉州距州二十里萬安橋絕海而濟行旅苦其險公立石為梁長三百六十丈種蠣於礎以固梁基又植松數十里蔭庇涂行至今賴焉嘉祐五年召拜翰林院學士權三司使三司開封世稱省府為難治公居之談笑無留事破姦發隱吏不能欺至商確財利則較天下盈虛出入量力制用必使下完上給剗剔蠹弊簿書紀綱皆有法程英宗即位以母老

求知杭州即拜端明殿學士治平三年丁母憂卒年五十有六贈吏部侍郎公文章清邁粹美工於書而仁宗尤愛稱之詔書御製元舅隴西王碑其後命學士撰溫成皇后碑文又勅公書則辭不肯曰待詔職也於朋友尚信義聞其喪不御酒肉為位哭盡哀乃止公三子勻旬皆早世朝廷錄季子旻及旬子傳乾道中孫伸請於朝賜諡忠惠有莆陽居士集行於世

特進蔡伸道先生伸



蔡伸字伸道襄子旻之子也與兄佃佃入太學俱有聲  
時號三蔡佃崇寧二年進士方廷對時從祖京當軸使  
謂曰能過我第一人可得佃不屈及揭卷佃舉首京詭  
辭曰陛下不以佃不肖而使冠多士恐天下以陛下私  
臣上以為誠乃置第二會星異上疏論宰相非人宜舉  
漢汲黯故事以應天變責監温州稅官至朝奉郎直龍  
圖閣佃大觀三年進士官至徽猷閣待制伸政和五年  
進士累遷通判徐楚饒真四州在徐州時禁卒謀亂約

夜半舉火伸聞密為之備故緩更籌以誤之比舉火則  
黎明矣叛卒盡就擒在真州日值火災民露處雪中伸  
措置有方且欲發常平廩以賑守者不可伸曰此國家  
所以備非常也如得咎請獨當之事聞釋不問改知徐  
德安和四州初伸與秦檜同舍又同年後伸以趙鼎黨  
丐祠者累年檜一日訪伸叙舊好伸不應出為浙東帥  
司叅謀官建炎紹興間盜賊蠭起伸嘗曰國步多艱中  
原未復豈能以書生餘技取爵祿耶時戚方既降而叛

伸單騎至其麾下說之就招州民以寧官至左中大夫卒贈特進子洸以父任歷官尚書學士自有傳從孫戡進士僑居毘陵歷官寶謨閣直學士著定齊集四十卷

朝請蔡子應先生樞

蔡樞字子應傳仲子政和五年同從父伸登第歷官西京提舉學司主管文字御史常安民在黨籍人多疎之樞獨事以師禮提舉湖南學事時殿中侍御史張所教授潭州未知名會所白事樞問曰時事如此度今誰可

任國事者所舉劉安世樞瞿然曰自崇觀來禁錮元祐之學文字言語稍涉疑似者必置之法子為教官乃敢伸公論若是耶即薦所後果知名年四十五慨然嘆曰先公掛冠之年吾已遇之時方多事其可無功冒寵乎致仕去榜所居堂曰世隱宣和末興燕雲之師主兵者欲引樞為謀議官樞以書止之累官朝散郎守職方員外郎贈朝請大夫子頤進士宣教郎知寧德縣孫師言數言皆登第

備考

明成化六年巡撫滕昭修墓建祠立碑每歲重陽令有司遣官致祭郡人柯潛記略曰成化六年春四方多以災沴奏聞當寧選大臣巡行天下凡民間利病可興可罷者皆許便宜行之庶幾格天心召和氣以康惠億兆民而都察院右副都御史滕自明公在選中乃奉璽書建節以來吾閩首訪百司吏以貪殘著聞及衰老庸懦不事事者皆斥去而褒獎廉勤慎厚者使益修其政興

太平之治既又巡行諸郡過興化仙遊之楓亭見道傍有巨碑刻云宋端明殿學士忠惠蔡公神道悚然曰此非嘗為四賢一不肖詩世稱直臣者耶遂下馬周視其墓蒙翳榛莽中亟發從吏馳諭分巡按察司僉事周君謨亟俾督所司修之乃以夏六月始事先封填顏塘次作享堂刻歐陽文忠公所撰墓志立於堂中以冬十月畢工方其經始也或謂公墓在赤湖焦坑而此為非是按墓志載公葬於莆田將軍山當時豈地屬莆田後又

屬仙遊因此近有將軍墓故名曰將軍山今俗人又呼  
為蔡山則因公姓而得名又況有碑石題識可據則此  
為公墓無疑赤湖焦坑去此六七里則其為父母之墓  
文忠公亦嘗銘之所謂其里慈孝其岡平井即其地也  
歷歲既久地里紛更為子孫者尚亦遺忘況鄉里之人  
得於傳聞者安得不謬誤哉任其事而考視詳審者知  
府蔣君雲漢協力而成者同知習君襄推官李君俊甫  
田縣王君玉既成合言屬余記云

閩中理學淵源考卷十一



欽定四庫全書

閩中理學淵源考卷十二

廣平府知府李清馥撰

溫陵陳氏家世學派

按陳休齋知柔撰九日山墨妙堂記云國朝進士顯名繇大諫錢公會楚公龍學公踵之大諫者錢公熙楚公者曾公會龍學公即休齋伯祖龍圖學士陳公從易也諸公為泉南人物一時之倡公起家以清德

文學知名景德後文士雕靡相尚公力挽頽風與揚  
公大雅共矯其弊清源文獻載六一詩話曰陳舍人  
當時文方盛之時獨以醇儒古學見稱其詩多類白  
樂天云再按休齋雖繫籍永春閩書錄入晉江附龍  
圖之後其家世源流信有本焉次崖林氏贊休齋如  
雲鴻野鶴飛翔於千仞九霄之表其贊後嗣曰中行  
開邊之策足以定國是端行江中之語足以懾遠人  
介行經學之優景魏治才之美皆能世振箕裘無玷

家聲者矣今錄其世系載於篇

龍圖陳簡夫先生從易

陳從易字簡夫晉江人端拱二年進士及第初調彭州  
軍事推官王均盜據成都陷綿漢諸郡彭人謀殺都監  
以應從易攝州事擒誅首惡戒將吏嚴城守積薪舍後  
戒家僮曰守而不支薪焚我矣賊聞有備去召為秘書  
省著作佐郎遷太常博士出知邵武軍專務德化改監  
察御史召對便殿命賦瑞雪詩援筆立就真宗嘉獎遷

侍御史直史館知虔州吉州改福州未行遭父喪服除  
出湖南轉運使歷太常少卿直昭文館後知廣州遠俗  
安靖璽書褒美加三品服址還不蓄南物仁宗聞之權  
知制誥飛白書清字賜之初景德以後文士雕靡相尚  
一時學者向之及從易知制誥與楊大雅同官相善皆  
好古篤行獨守不變適朝廷方矯文章之敝故並進二  
人以風天下兼史館修撰遷左諫議大夫以老辭請補  
郡進龍圖閣直學士知杭州卒從易嗜學強記激直少

容喜別白是非多面折人或尤其過終不改元豐中神  
宗問頌卿母誰氏頌以從易對上曰天聖間學士邪頌  
因言從易知廣州不蓄南物上曰清節過馬援矣先是  
宰相寇準惡從易疎已除從易吉州及準貶道州丁謂  
語從易曰廬陵之事可以釋憾矣從易曰當以故相之  
禮待之謂有愧色其志行多類此所著泉山集二十卷  
中書制誥五卷西清奏議三卷孫孝則

閩書 萬歷  
志 通志

提刑陳永仲先生孝則

陳孝則字永仲晉江人舉宣和進士調東莞尉以薦改秩通判潮州知英州代還奏罷涵口稅場除廣南東路提點刑獄出舶商於死獄居家十餘年舶商至泉中望廬瞻拜念祖父之風結屋城隅以清名室守王十朋贈之詩我來聚星地喜見此老成公清不自言藹然著鄉評時尋訪其室鄙吝不敢萌如覲任棠水似濯滄浪纓其歿也復哭以詩有心勞撫字陽司業獄喜平反雋不疑頭白不忘文字示室清宜作子孫規之語子頴弟知

柔

州守陳中行先生謨

陳謨字中行材氣高邁貫穿經史開門受徒戶屢常滿  
登慶元二年進士宰執以學行薦除國子正開禧初召  
試館職時議開邊模對策謂王恢首謀之戮不足以贖  
僵尸百萬之冤泰政李壁讀之嘆曰真館職也除秘書  
省正字校書郎通判鎮江府平鹽鈔法公私俱便知梅  
州多惠政民為立祠改汀州民以綵旗迎於界上有曰

忻迎鄞水新賢守知是梅州舊使君居五月卒號可軒  
門人多名士達宦有經史管窺行於世子晉接紹定壬  
辰進士仕國子司業宗正卿

泉州府志  
永春邑志  
閩書

安撫陳端行先生樸

陳樸字端行知柔從子乾道二年進士歷知漳州節浮  
費五萬為民代輸身丁以左司郎接伴金使舟行大江  
中流風暴作金使駭汗樸笑傲自若曰此天之所以限  
南北者守疆息民則天福之江有神不可欺也使者悚



然擢太常卿除知廣州兼廣東安撫革弊例帑羨受代  
儲錢數十萬上於朝

閩書

陳介行先生機

陳機字介行學問該貫尤長於詩寫情咏物若不經思  
往往出人意表嘗有讀易詩云從此不除窓外草要觀  
天地發生心又曰須信生生是真易疎籬依舊竹生孫  
其深於經而語意之到如此

泉州府志

郡守陳先生景魏

陳景魏知柔從孫以郊恩補信州鉛山簿歷監贛州會昌倉石城寇竊發景魏請乘機掩捕郡守然其計破賊寨擒其酋餘黨悉平辟廣州新會丞改知潮陽縣歲輸丁銀郡守督拘錠頭錢盡械邑吏景魏曰吾寧以罪去決不阿奉貽害無窮守不能奪由提轄文思院改知惠州郡有疑獄久弗決景魏讞出之重正胥魁之罪惠經兵燬痛自樽節起學宮官解仍以餘力葺白鶴故居合江樓六如亭歲大饑上言民瘼未瘳減惠陽糴米三之

一擢知潮州後知英德卒洪天錫狀其行謂其少不倨

老不惰病不昏化不怛信善人云

閩書  
泉郡志

按閩書云陳知柔而下舊入永春志但知柔與孝則親兄弟不宜分屬故並載晉江云

州守陳休齋先生知柔學派

按永春志乘次唯林先生曾總厥事其表章前哲載於志書及集中特詳而陳氏一門尤數見者矣志稱陳自南宋入明合族以居歷世十二內外雍睦公盛年從仕以不附秦檜即矢志歸自號休齋居士前後四

奉祠戶外屨滿又考王忠文公年譜并文集乾道四年八月知泉州是冬蒞泉六年某月移知台州在泉時贈公詩云儒先賀州守正氣超等倫又曰門下有高弟廟堂手經綸房魏方得君詎肯忘河汾計彼時泉之在廟堂者同里有梁公克家考宋宰輔年表乾道五年四月壬辰梁公自端明殿學士兼參知政事但梁公受業師志乘載永春陳諱光者見陳光本傳而忠文之詩所言門下有高弟而未指出其人歷稽

志乘莫有及之者然考之忠文年譜文集按之宋宰  
輔表為梁公似無可疑再攷陳氏光與休齋同邑為  
交友而蔡氏茲與休齋同登第梁公當軸時曾經薦  
除蔡公為廣憲是梁公平日師友盡在於永則其講  
授於二陳切磨於蔡公往復講論淵源似有由來也  
惜休齋諸公著述已殘缺久湮賴忠文詩章猶可顯  
證謹志所疑登錄梁公載入休齋學派俟博攷者訂  
之再按公平生與紫陽文公極厚其經學最顯著惜

亦多佚嘗自言曰學者要論當世尚友考其行事以  
無愧於天地間足矣次崖林氏稱公如雲鴻野鶴飛  
翔於九霄九仞之表諒哉 又按蔣氏亘曰泉郡如  
陳體仁崇禮晦翁傳述經書與黃景傳巖孫之潛究  
周張蔡白石廷傑之嚴絕浮屠張子文巽之理辨精  
微又如永春蔡光烈茲主貢舉特拔晦翁可稱知人  
數公皆邃於理學宜建特祠按蔣公所論後之欲表  
章泉南人文之倡者必有取焉

州守陳休齋先生知柔

陳先生知柔字體仁永春人性超邁聰穎刻志墳籍紹興十二年進士授台州判官辨釋冤盜四十餘人教授建州汀州兩奉祠歷知循州徙賀州先生與秦檜子熺同榜檜當軸一時前列十餘人俱以攀援致通顯先生獨不阿附以故齟齬盛年從仕即有歸志自號休齋居士雅好山水在天台奉安遍遊名山歸至會稽耽其巖壑留二年罷賀州留惠陽三年暇日泛豐湖登白鶴峯

和東坡詩羅浮風物陶寫殆盡還參議福建幕前後四  
奉祠諸生從之戶屢常滿寓僧房四壁蕭然豪氣不少  
衰遇名勝輒置酒賦詩相與談論經旨所著有易本旨  
十六卷易大傳二卷易圖一卷春秋義例十二卷古學  
并圖二卷詩聲譜二卷論語後傳十卷詩話五卷又有  
梅青傳詩騷古賦雜著毋慮千百篇皆行於世王氏龜  
齡贈詩云我來守清源德星識二陳大陳如金玉一室  
清無塵厭世不肯留至今里稱仁儒先賀州守正氣超



等倫胸中包古今筆下真有神唾手取巍科齒髮方青  
春聲名滿天下文字驚縉紳勞人暫州縣平步當要津  
蹉跎忽至今此志猶未伸真人奉香火蕭寺含悲辛講  
席延諸生黃卷呵古人異端斥佛老吾道鳴孟荀聊藉  
束脩禮少資囊橐貧我忝二十石二年牧斯民不能助  
玉川恥與韓公均贈我詩與文字字皆可珍寵褒恨太  
過感激難具論願公少自愛行矣當致身門下有高弟  
廟堂手經綸房魏方得君詎肯忘河汾知柔卒朱文公

於淳熙十一年三月祭之文燾少日遊宦獲從公遊泉  
漳間蒙公愛予誘掖良厚其後別去幾三十年去歲之  
冬復見公相與開懷握手如平生歡公雖老矣意氣不  
衰為我置酒談論經義篇什間作疊疊不休相與追遊  
蓮華九日涼峯鳳凰雲臺之間晝則聯車夜則對榻視  
公起居食飲叫呼談噓有非後生所能及者謂公壽考  
未艾也及燾之還公復載酒餞我洛陽則操袂分攜潛  
然不樂久而不能平也不謂未及兩月公訃遽來嗚呼

痛哉公於諸經皆有論述許以寄我相與考評而今而後不復遂此願矣

閩書

永春志

郡志

王

梅溪文集

朱子文集

### 通判陳又之先生一新

陳一新字又之永春人少受學陳休齋知柔文章志行迥出流輩登紹興元年進士條對剴切為時所稱教授汀州慶元四年較藝漕闈時韓侂冑用事一新發策以谷永攻君而黨王氏劉蕡言直而有司不取為問同列請易之一新堅執不聽果激韓侂冑怒將以為罪侍臣

力救得免累遷國子博士輪對深論權倖以劾免通判  
婺州知邵武軍却互送簡供餽以廉平稱卒於官初言  
者請下漕官索考官不習偽學狀一新曰吾寧不為考  
官決不書也其守義如此所著有奏劄講義詩詞雜文  
藏於家

閩書 永  
春縣志

同安蘇氏家世學派

昔朱子莖仕同安為公建祠每嘆後生晚學不復講  
聞前賢風節學問源流是致士風日就凋弊顧念公

之道德純懿即邑人族家子弗克究知而追惜聞見  
單淺為風俗之陋嗟乎宋於斯時正際國運昌明而  
遐陬僻邑文獻未彰亦蹈習乎耳目之近者耳自朱  
子表揚倡教之後泉南風氣日開踵後起者於是知  
功烈之盛必本於道德大賢之澤其過化有如此者  
攷魏公之父已遷移外徙然讀朱子祠記云有族家  
子則尚有族派在同者再攷邑秉公之弟袞慶厯六  
年進士懷忠公緘之弟結皇祐元年進士公之子駒

元豐二年進士公孫象先元祐六年進士公之四世  
孫漢慶元二年進士皆宋世科目見於閩書邑乘至  
明嘉靖鄉薦有蘇氏瀾為公裔孫精春秋學官至縣  
令年九十終其後嗣登鄉薦文學而名載於鄉賢者  
尚多

國朝裔孫蘓氏莪寄寓臺灣登康熙丁卯鄉薦為臺科  
目之始則公雖遷於外而苗裔留閩者尚未艾也尚  
有在粵見志邑乘蘇氏祠記未及備述

蘇先生光誨

蘇光誨父益自光州固始隨王潮入閩誅叛將黃紹頗  
留從効表為漳州刺史陳洪進憚之計召至同安為大  
第留不遣密使人之漳奪其任遂為同安人陳氏納土  
後盜起遊洋光誨夕殪盜魁十餘人送首級於州將喬  
維岳太宗召赴闕遷左衛將軍子仲昌天聖二年殿試  
被勲致三班官歷任荆湖南北路提點刑獄知宜邵復  
三州終左屯將軍子孫累世貴盛

正簡蘇子容先生頌

蘇頌字子容同安人父紳葬潤州丹陽因徙家焉公登  
慶厯二年進士第歷宿州觀察推官知江寧建業承李  
氏後版圖無藝征斂高下出吏手公因他事互詰丁產  
詳其隱蔽剗剔夙蠹簡而易行諸令視以為法調南京  
留守推官留守歐陽脩委以政曰子容處事精審一經  
閱覽吾可不復省矣時杜衍退老睢陽見公深器之曰  
如君真不可得而親疎者悉語以入官至侍從宰執所



以設施處置曰老夫非自矜以子相知且知異日必爲此官耳公後履歷亦略似衍皇祐五年召試館閣校勘同知太常禮院至和中有司請建大臣家廟下太常公議謂禮大夫士有田則祭無田則薦今若叅今古制爲之差等錫以土田然後廟制可行不然時雖建立子孫無爵無土制亦易廢請攷按唐賢寢堂祠饗儀止用燕器常食而已嘉祐中議立郭后神御殿事謂郭后無可廢之事仁宗有不當廢之悔請附郭后於後廟加一懷

哀愍之謚以成追復之道庶盡之矣曾公亮深嘆服之  
遷集賢校理富弼與韓琦為相同表其庶退以知潁州  
歷擢知制誥時王安石用事以李定為御史宋敏求知  
制誥封還詞頭復下公當制公報奏不具草次至李大  
臨亦封還於是并落知制誥歸工部郎中班時稱熙寧  
三舍人歲餘出知婺州方沂桐廬江水暴迅舟橫欲覆  
母在舟中公哀號祈籲舟忽自正母甫及岝舟覆人謂  
孝感尋加集賢殿學士知應天府呂惠卿語人曰子容

吾鄉先進苟一詣我執政可得也公聞之笑而不應凡更三赦得授秘書監知通進銀臺司吳越饑選知杭州公宴客有美堂或告將兵將亂公密使捕渠領十輩荷校付獄中迨夕會散坐客不知也及脩兩朝正史轉右諫議大夫使契丹遇冬至其國歷後宋歷一日北人問孰是對曰歷家算術不同時刻小異或先或後各從其厯可也使還帝善其對元豐初權知開封府尋貶秘書監知濠州改知滄州召判尚書吏部兼詳定官制唐制

吏部主文選兵部主武選帝謂三代兩漢本無文武之別議者不知所處公言唐制吏部有三銓法分品秩掌選事今欲文武一歸吏部則宜分左右曹掌之每選更以品秩分治自是吏部始有四選法又問宗子主祭承重之義對曰古者貴賤不同諸侯卿大夫皆世爵故有大宗小宗主祭承重之義匹夫庶人初無與焉近代不世爵宗廟因而不立尊卑亦無所統其長子孫與衆子孫亦無以異今五服嫡孫為祖父為長子斬衰三年世

俗論為承重不知為承大宗之重也臣聞慶厯中朝廷  
議百僚應任子者長子與長孫差優與官餘皆降殺亦  
近古立宗之意請詔禮官博士叅議禮律合承重者酌  
古今收族主祭之禮立為宗子以繼祖禰異於衆子孫  
士庶人不當同用一律使人知尊祖不違禮教也除吏  
部侍郎遷光祿大夫遭母喪中使唁勞賜金元祐初拜  
刑部尚書兼侍讀奏言國朝典章沿襲唐舊乞採新舊  
唐書中君臣所行日進數事以備聖覽因詔經筵官遇

非講讀日進漢唐故事二條公所進可為規戒有裨時  
事者必述已意反復言之每進讀至弭兵息民必援引  
古今以動人主之意嘗奏言陛下聰明不可有所偏向  
有所偏向則為患大矣今守成之際應之以無心則無  
不治遷吏部尚書前後掌四選五年由翰林學士承旨  
擢尚書左丞行樞密院事七年拜右僕射兼中書門下  
侍郎即在位務奉行故事使百官守法遵職量能授任杜  
絕徼倖之原深戒疆場之臣邀功生事論議有未安者

毅然力爭之故當母后垂簾之秋能使元祐之治比隆  
嘉祐時羣臣奏事但取后旨帝有言或無對者惟公奏  
太后已必稟帝命有宣諭必命諸臣聽聖語及后崩章  
惇用事周秩劾之帝曰頌知君臣之義無輕議此老乃  
免以論賈易事為楊畏等所劾遂上章辭位罷為觀文  
殿大學士集禧觀使出知揚州徙河南辭不行告老以  
中太一宮使居京口紹聖四年加太子少師致仕徽宗  
立進太子太保爵趙郡公建中靖國元年薨年八十二

詔輟朝贈司空理宗朝賜諡正簡公器局宏遠不與人較短長以禮法自持雖貴自奉如寒士事祖母及母養姑姊妹與外族數十人甘旨怡悅婚嫁以時妻子衣食或反不給晏如也富弼嘗稱為古君子潁州通判趙志忠自言已雖生長邊徼然見義則慕平生心服者惟公與魏公耳自書契以來凡經史九流百家之說至於圖緯律呂星官算法山經本草無所不通尤邃律厯常請別製渾儀即命提舉法度精密占候不差前此未有也



深明典故喜為人言亹亹不絕朝廷有所制作必就而正焉嘗議學校欲博士分經課試諸生以行藝為升俊之路議貢舉欲先行實而後文藝去彌封謄錄之法有司叅攷其素行之自州縣始庶幾復鄉貢里選之遺範論者韙之按徐氏却掃編載公之子京字世美嘗為許州觀察判官時韓黃門特用知州事甚器愛之薦於朝曰竊見某讀書知義理臨事有風力云

宏簡錄  
閩書

府志  
徐氏

却掃  
編

按明林貞肅公俊撰泉州府志敘稱公為忠簡攷同安邑志宋理宗朝邑人吳燧在臺請謚正簡並錄之待訂

懷忠蘇宣甫先生緘

蘇緘字宣甫紳從弟也素有俠負慕古忠臣義士之蹟  
寶元五年登進士第初授河南簿再調陽武尉緘本儒  
者嘗馳馬手斬劇盜送府府尹賈昌期驚曰儒生乃能  
爾耶累遷秘書丞知英州儂智高圍廣州緘奮曰廣去  
吾州近危而不救非義也即募士數千人委印於提點  
刑獄鮑軻夜行赴難廣人有黃師宓者為賊謀主緘擒

斬其父復捕殺不逞者六十餘人招其誑誤者六千餘人使復業賊勢阻將解去緘分兵先扼其歸路摧傷甚衆奏至仁宗語執政曰南事淹時戰將未聞有功蘇緘儒生乃能奮勇如此優授供備庫副使充廣南西道兵馬都監遣中使賜朝衣金帶以寵之後以邕大將陳曙失律誅緘亦坐貶英宗即位大臣論薦始還副使知廉州熙寧初進加京使廣東鈐轄四年交趾謀入寇以緘充皇城使知邕州八年交寇陷欽廉乘勢迫邕閩郡得

羸卒二千八百人分城拒守民驚震四出緘悉出官帑及私藏示之曰賊已薄城宜固守以遲外援若一人舉足則羣心搖矣幸聽吾言敢越佚則孥戮汝大校翟績潛出斬以徇由是上下脅息緘晝夜行勞士卒發神臂弓射賊所殪甚衆會劉彝所遣將張守節來救者猝遇賊皆覆蠻獲北軍使為雲梯又為攻濠洞蒙以革布緘悉焚之蠻計窮將引去或教賊囊土傅城者頃刻高數丈蟻附而登城遂陷緘猶領傷卒馳驅戰愈厲而力不

敵乃曰吾義不死賊手亟還州治殺其家三十六人藏於坎乃縱火自焚城中人五萬八千餘口感其義無一人降者蠻遂盡屠其民緘憤沈起劉彛致寇又不救患欲上疏論之屬道梗不通乃榜其罪於市冀朝廷得聞焉神宗聞緘死嗟悼贈奉國軍節度使謚忠勇賜都城甲第一區鄉里土田十頃官其子子元子元為閤門祇候召對謂之曰邕州賴卿父守禦倘如欽廉即破則寇乘勝奔突桂象皆不可保矣昔張巡許遠以睢陽蔽江

淮較之卿父未為遠過改授殿中丞通判邕州次子明  
子正及諸孫同死皆褒贈焉起與劉彛皆生謫官後交  
人謀寇桂州行數舍見大兵從北來呼曰蘇城隍領兵  
來報怨懼而引歸邕人祠之賜額懷忠黃萬頃贊曰昔  
守邕州交寇馮陵戰厲力窮義氣猶橫合家自刃肯污  
羶腥千秋萬歲烈烈風聲

閩書原按曰絨傳出宋史又按江西志載絨嘗令  
崇仁南城二縣其令崇仁民喜爭田有數十年不  
決者絨一斷以法未半歲庭無留訟治寶塘堤治  
鐵為纜以作梁其令南城歲凶民藏粟者固閉待

價緘籍得其數先發常平穀定中價糶於民揭榜於道曰某家有粟幾何令民用官價糶有勒不出及出不如數者撻於市以是民無艱食子元嘗知橫州以恩信得民

### 備考

朱子請立蘇丞相祠堂申縣狀曰右某等伏覩故觀文殿大學士太子太保致仕贈司空趙郡蘇公道德博聞號稱賢相立朝一節終始不虧有其高曾世居此縣比因遊宦始寓丹陽今忠義榮義二坊故宅基址宛然尚在而後生晚學不復講聞前賢風節學問源流是致士

風日就凋弊某等今欲乞改榮義坊為丞相坊仍於縣學空間地架造祠堂一所不惟增脩故事永前烈之風聲庶以激勵將來俾後生之竦飭謹具狀申縣

奉安蘇公祠文曰泉人衣冠之盛自國初以至於今其間顯人或至公卿者多矣然而始終大節可攷而知則未有若公之盛者也惟公著節於熙寧登庸於元祐而幅巾謝事偃仰婆娑於紹聖元符之間然則公之所自任於進退出處之間者可謂無所苟矣蓋將以比古之



所謂大臣者豈獨衆人數公而已哉今以邑人之意祠公於學即事之始敢布其衷尚饗

蘇丞相祠記曰熹少從先生長者遊聞其道故相蘇公之為人以為博洽古今通知典故偉然君子長者也熙寧中掌外制時王丞相用事嘗欲有所引拔公以其人不可用且非故事封上之用此罷歸不自悔守益堅當世高其節與李才元宋次道並稱三舍人云後得毗陵鄒公所撰公行狀又知公始終大節蓋章章如是以是

心每慕其為人屬來為吏同安同安公邑里也以公所  
為問縣人雖其族家子不能言而衆人往往反喜道曾  
宣靖蔡新州呂太尉事以為盛予不能識其何說也然  
嘗伏思之士患不學耳而世之學者或有所怵於外則  
眩而失其守如公學至矣又能守之終其身一不變此  
士君子之所難而學者所宜師也因為之立祠於學歲  
時與學官弟子拜祠焉而記其意如此以示邑人云

陳氏傳良跋魏公百韻詩稿後曰余嘗慕魏公之為人

今見晚所自叙百咏遺稿非獨其人品殊絕蓋其及見  
故老與師友淵源所漸盛矣余於是知慶厯嘉祐之際  
人物之偉嗚呼城門之軌豈兩馬之力哉自三經之學  
行士以師心自賢不能降以相從而風俗日壞其流弊  
何可勝道追想前輩高山仰止龍圖陳公諱從易曾胡  
田楊四公者諱公亮宿况偉也楊以慶厯八年會田以  
皇祐三年胡以五年相繼為學士云

明永新劉氏定之重建蘇丞相祠堂碑畧曰公名頌字

子容當王安石執政欲擢憺黨李定公掌外制堅不肯  
搞辭卒就貶謫可謂文見用而不輕用焉既以是忤王  
而繼王操柄能致士霄漢者呂惠卿使來告曰公吾鄉  
丈苟能從吾言便可同升公笑而不答平生合志者廬  
陵永叔嘗為寮曰公處事精審吾可不復省閱眉山子  
瞻嘗為寮曰見公文德殿為三舍人之冠陪公邇英殿  
為五學士之首雖凌厲高躅不敢言同而出處大節無  
甚相異可謂時不合而合於賢焉公之先君紳道迹王

堂而公踵武然公尤操行潔特學問該博蓋頭之獻替  
踰於其父環軾之波瀾弘於其父洵蘇有宗風子光乃  
考公豈不為孝乎公拜相以元祐壬申夏其罷以明歲  
癸酉春踰年而紹聖紀元新法復用羣奸起衆正仆然  
則公進焉匡朝寧邦退焉先幾知止公豈不為忠乎凡  
是四者公皆有之可謂君子也昔者紫陽朱文公簿同  
安嘗飭公祠廢不復存余見公邑士族裔每問其遺跡  
莫能知為之嘆息今其邑貳令永新劉珣器謀欲重構

之珣器由賢良舉明練政務既脩文公舊所居高士軒  
乃及茲良可嘉也予為之記而繫以楚詞使供祠香火  
者歌以祀公

文靖梁叔子先生克家家世學派

按宋南渡後講學論道之盛必曰炎興乾淳余考吾  
郡士風家法亦於是時最著蓋諸儒承北宋流風餘  
槩至靖康時寢微寢晦矣龜山楊文靖公載道南來  
渡江後歸然仔肩道脉於時閩之分派者多屬上游

至是漸徧海濱蓋風氣日趨於南人物亦猶是也紹興之季文靖梁公首以淳品魁多士而同郡留忠宣公亦同時聯第史稱梁才優識遠謀國盡忠留亦以相業著二公先後秉軸攷其時所師友者陳公知柔陳公光而知柔休齋氏尤為一時士類所宗戶外屨滿梁公其一也

此見王梅溪贈陳氏知柔詩可考

然其所薰炙師資

殆有所本爾攷泉之學派自陳氏好曾氏恬衍龜山之學而游文肅公酢又通判於泉程學至是萌芽矣

迨政和間韋齋朱獻靖公首以河洛之學掌教石井亦開倡之始也紹興間朱子涖同安遂彰明其學而派繫始盛休齋斯時與朱子特厚而蔡公茲與朱子有場屋之知故其聲氣感通非偶然也其時蒞茲土者亦多績學名家而王公龜齡於乾道五年涖泉尤為特出故當時為政者倡明於上在野者講述於里薰蒸洋溢至慶元寶慶泉之人文極著矣今錄梁公家世并及吾郡風教源流大畧云梁公子億克世其



家其從祖梁氏熙志崇寧間進士梁氏熙載大觀間  
進士皆無本傳可考惟郡志載梁氏克俊字叔明晉  
江人歷官知循州州人多其功祠之未詳其出身始  
末又雍正九年新志稿載梁公弟克明與公同登紹  
興二十三年鄉薦第一云

文靖梁叔子先生克家

梁克家字叔子泉州晉江人幼聰敏絕人紹興三十年  
廷試第一授平江僉判金主亮死衆皆言乘機進取克

家獨移書陳俊卿謂敵雖遁吾兵力未振恐有後悔俊卿歸以白丞相陳康伯嘆其遠慮孝宗即位召為秘書省正字遷著作佐郎灾異數見克家奏宜下詔求言既得旨遂條六事語甚切直累遷中書舍人使金以中朝進士第一敬待之金人來賀慶會節克家奏金使入朝由南門百官由北門從者毋輒至殿門外以肅朝儀詔著為令郊祀雷震復條六事遷給事中凡三年遇事不當執奏無隱嘗言陛下欲用實才不喜空言固知無益

然以空言為懲則諫爭之路遂塞願有以開導之上欣  
納因命條具風俗之弊乃列四條曰欺罔苟且循默奔  
競上獎諭乾道五年二月拜端明殿學士簽書樞密院  
事明年除參知政事又明年同知樞密院事在政府與  
虞允文可否相濟不苟為同皇太子初立請選置官屬  
增講讀員遂以王十朋陳良翰為詹事中外稱其得人  
初上命選諫官允文以李彥穎林光朔王質對不報克  
家與允文共爭之允文主恢復朝臣多迎合克家密諫

數不合力丐去上曰兵終不可用乎對曰兵事以財用  
為先今用度不足何以聚事上改容曰朕將思之詰朝  
面諭曰朕終夜思卿言至當無庸去八年拜右丞相兼  
樞密使一日上謂宰執曰近過德壽宮太上頗養愈勝  
天顏悅懌朕不勝喜克家奏堯未得舜以為已憂既得  
舜固宜甚樂允文奏堯獨高五帝之壽以此上曰然屬  
允文罷相克家獨秉政雖近戚權倖不少假借而外濟  
以和張說入樞府怒公議不與謀中傷士大夫克家悉

力調護善類賴之又奏前除樞密院編脩朱熹屢召不起宜乞褒錄上從之俄議金使朝見授書儀時欲移文對境以正其禮克家議不合求去九年十月以觀文殿大學士知建寧府陞辭上以治效為問克家勸上無求奇功既而三省密院卒移牒泗州敵不從遣泛使來舉朝震駭後二年湯邦彥坐使事貶天下益服其謀國之忠丁內艱歸有言其當軸除吏之戾者落觀文殿大學士服闋提舉臨安府洞霄宮久之淳熙六年起知福州

綽有治績得陳傅良通判福州喜甚委以俾贊郡事強  
禦者不得售其私九年復右丞相封儀國公逾月而疾  
十三年進封鄭國命與內祠兼侍讀賜第行在存問不  
絕明年疾愈入謝御製詩賜之有真儒良臣之褒十四  
年六月薨年六十手書遺奏上為之垂涕賜少師謚文  
靖初唱第時孝宗由建邨入侍愛其風度峻整及躋政  
府眷寵尤渥為文渾厚明白自成一家辭命尤溫雅多  
行於世弟克明與克家同登紹興二十三年鄉薦第一

子億以孝稱孫汲為運管見劉後村詩集

舊郡志

宋史

閩書

按宋史公淳熙八年起知福州今攷福州府志本傳及職官志皆云淳熙六年以資政殿大學士知福州再按樓公鑰撰陳止齋神道碑云陳公通判福州帥相梁公克家得公喜甚以政委之公亦悉心俾贊不事形跡卒以專擅論罷時淳熙七年也按此則梁公知福州在七年以前三山志似不錯誤今照三山志改作六年

又按宋史本傳罷觀文殿大學士知建康府通鑑綱目載知建寧府宋史宰輔表亦載知建寧府再按建寧府志公乾道間知建寧府朱子於淳熙元年撰建寧府社倉記亦言丞相清源公出鎮茲土入境問俗予與諸君因得其所為條約者迎白於公云再攷國朝一統志建康名宦亦有公名並錄

待致

通判梁伯安先生億

梁億字伯安以父任補官累遷主管西外睦宗院通判  
福州襟度夷粹母秦國夫人剛嚴奉使無違博親師友  
講學不倦嘗著論語集解上之進官一秩孫均通判信  
州

備考

陳止齋上閩帥梁丞相生日二十二韻詩曰炎正維中



葉皇圖再造年天潢流少海星緯粲台躔臣主常難並  
乾坤豈偶然千齡開歷數一氣付陶甄黃屋傳神器彤  
庭領衆仙風雲從此會日月更誰先昔者求侵地何人  
賦甫田吳兒咸抵掌噲等欲差肩廟論惟多士戎功不  
在邊一麾分赤社萬事屬青編吾道誠難用諸儒亦自  
偏才名多濩落經行失拘攣洛蜀何嗟及熙豐竟禍延  
旁羅兼鴈木平步忽貂蟬甚矣知當宁淒其望濟川年  
來群老行公在萬民懸定作鹽梅夢行歌杖屨還滄溟

宗衆濫衡獄倚蒼元要使垂身後無為慰眼前管絃無  
算爵桃李未央天魯燕雖堪頌閩山不足鐫中原康濟  
事彞鼎願聯翩

又祭梁丞相文曰麟鳳不摯帝王瑞之木德為春萬物  
善時維皇龍潛公為舉首天授之相有司之手維皇至  
聖維天之仁維相休休嘉靖此民澤農欲晴山農欲雨  
公在相位高杭下黍彼有言戰此有言守公在相位兵  
不挂口人亦有言誰怨誰德公曰刑賞其在三尺人亦

有言匪同斯異公何適莫靡立一意乾道經畧淳熙無  
為從容其間不競不隨上之咎言下之缺望弗及其身  
人自得喪公疾未劇公歸已決帝曰如何咨爾同列至  
於領祠至於賜第宿留經帷愈好勿替我觀自昔蕭曹  
周召經史云云如公特少方舜命禹宜師宜保薄海有  
恨公不壽考公不壽考薄海恨之矧如傅良辱愛辱知  
屬官窮楚遭歲之繆爰及祥琴文始克就太常有誄太  
史有傳迺如斯文聊以哭奠

朱子挽梁文靖公詩曰擢第初龍首登庸再鳳池心期  
詎溫飽身任必安危昔歲調飢政今年殄瘁詩恭惟哀  
斂意不盡鑒亡悲 疏寵無前比騰章又夙心極知求  
士切端為愛君深鹵簿寒茄遠塵埃斷稿侵空令郝公  
掾衰涕滿寒襟

癸辛雜識云沈夏德清人為版曹貳卿一日登對上問  
版曹財用幾何虧額幾何夏一一奏對訖於所佩夾袋  
中取小冊進呈無毫髮差上大喜次日問宰臣曰侍郎

有過政府例否梁克家奏云陛下用人何以例為遂特除簽書樞密院事

永春黃維之先生偉家世學派

按黃維之先生與朱子相友善朱子稱其西銘太極諸說皆積數十年之功當官事蹟尤多可紀晚歲歸然典型為鄉邦模楷朱子於淳熙十年冬重至溫陵公與休齋陳公年皆無恙朱子贈休齋詩云一官避世今頭白萬卷收功久汗青又云歸歟吾黨又千里

老矣心期但一邱珍重休齋書滿屋可無三宿為君  
留答黃叔張詩曰衆流爭靡靡一柱獨亭亭只恐追  
鋒急那容晝掩局一時舊友會合重逢歲晏所相期  
許者古道照千載矣

提學黃維之先生偉

黃偉字維之後即為名更號叔張弱冠從兄巽之入太  
學屢試占首與黃槐同時人稱二黃紹興二十七年第  
進士除太學錄遷國子監簿轉對進所撰太祖政要論

愛名器厲廉恥因及銓試冒名代筆其後任子覆試議  
自偉發之時孝宗銳意恢復方講武事獻議者乞立武  
賢良科下館學集議維之謂賢良求文武全材不宜復  
立科事遂寢除大理寺丞時少卿欲奏獄空維之以所  
隸有獄未竟不敢書名寺削去維之名銜以聞維之白  
執政有官守者不得其職則去力求外補差知邵武軍  
陞辭賜對論選用大臣當如王素對仁宗宦官宮妾不  
識名者可充其選又論乾道新書不當刪減內侍不得

干預朝政等事孝宗面加褒諭翌日出劄子付勅局復  
舊法後歷官江西提學維之為小官恥於求舉及更麾  
節所薦引多寒士其挾貴而來者未嘗舉一人數歷中  
外直道而行居閑十年手不釋卷嘗與朱子論學後進  
以鄉先生事之維之亦喜接引傳內翰伯壽頌郎中咸  
出其門自號竹坡居士年七十九卒之日夕猶與諸子  
講論至夜分子以寧以簡以大猶子以翼

通判黃宗一先生以寧



黃以寧字宗一分教惠陽指授有法擢太學錄差淮西  
漕司幹官幕畫明辨漕使憚之會淮南大歉部使者檄  
以寧循行賑貸區畫有方通判建寧守史彌堅彌遠介  
弟喜事尚威闕決有不可引誼力爭守積不能平熒臺  
臣劾罷之父老遮留數千歸家杜門食祠延接後進講  
論忘倦或有不善面加譙責郡守樂咨以政毫無私答  
端平親政忤權臣者皆召人惜其先卒弟以簡知永福  
縣以大知循州

黃宗台先生以翼

黃以翼字宗台維之從子也嘗受業陳北溪蔡白石之門莊毅有立析理精詣晚年記問益富所著有周易禮

說

道南源委  
郡志

備考

朱子答黃叔張曰示及三書感感誠通誠立之論誠如尊諭不敢多遜竊意自有此書無人與之思索至此西銘太極諸說亦皆積數十年之功無一字出私意釋氏

以胸襟流出為極則以今觀之天地之間自有一定不  
易之理要當見得不假毫髮意思安排不著毫髮意見  
夾雜自然先聖後聖如合符節方是究竟處也

閩中理學淵源考卷十二